

taw der süssigkeit. ein gab der lyebin.
ein vas der eren vnd himelischer gno-
den. **D**u glori der stat iherusalem. du
freud in Israhel. du ersamkeit dyns
volcks. **D**iungfrow **M**aria. du bist
rich in al. vñ gesegnet vber al/so doch
ein kleiner teil vō diner substācz geno-
mē. gnügsā gewesen ist aller welt sund
zūbezalen. **D**ā der aller höchst het vō
dez ertrich. dz ist vō dir maria gesch-
affen die arczny (als dy geschrift sagt)
vñ der wyß man wirt sy nit schewhen
Barüb in welcher maß ich die loben
sol. die do mer ist dan alles lob weyß
ich nit. durch welcher fruchtberkeyt
ich gefāgner erlöst. durch welcher ge-
berüg ich verurteilter vō dem ewigen
tod erkaufft. durch welcher geschlecht
vñ edle frucht ich verlorner gefundē.
vñ vß dē ellendt dises iamertals in dz
vaterlandt ewiger seligkeit widerüb